

Ársskýrsla ársins 2007





*Þverholti 2
270 Mosfellsbær*

*Sími: 525 6795
Bréfasími: 525 6799*

Ársskýrsla ársins 2007

*Forsíðumynd: Rykmökkur á Álfsnesi
Þorsteinn Narfason tók myndina á Tungubökkum í Mosfellsbæ í
29. apríl 2008.*

EFNISYFIRLIT

1. INNGANGUR	3
2. FJÁRMÁL	3
3. STJÓRNSÝSLA	3
1.3 KVARTANIR	4
1.4 ÞVINGUNARÚRRÆÐI	5
2. MATVÆLAEFTIRLIT	5
2.1 INNRA EFTIRLIT	5
2.2 VERKEFNI Í MATVÆLAEFTIRLITI	5
2.3 NEYSLUVATN	7
<i>Gæði vatnsins</i>	7
<i>Vatnsvernd</i>	7
3. HOLLUSTUEFTIRLIT	8
3.1 ALMENNT HOLLUSTUEFTIRLIT	8
3.2 HUNDAEFTIRLIT	8
<i>Seltjarnarnes</i>	8
<i>Mosfellsbær</i>	8
3.3 MEINDÝRAEYÐING	9
<i>Seltjarnarnes</i>	9
<i>Mosfellsbær</i>	9
3.4 EFTIRLIT MEÐ ÍBÚÐARHÚSNÆÐI	9
3.5 FUGLAFLENSA	9
4. UMHVERFISEFTIRLIT	10
4.1 ALMENN UMGENGI	10
4.2 ÚRGANGUR	10
<i>Sorp</i>	10
<i>Fráveita</i>	11
<i>Rotþrær</i>	11
4.3 VÖKTUN VATNASVÆÐA	11
<i>Flokkun Vatna</i>	11
<i>Tilkynningar um óhöpp vegna mengunar</i>	12
4.4 UMSAGNIR	12
5. STARFSMENN, STARFSHÓPAR OG RÁÐSTEFNUR	13
6. SAMTÖK HEILBRIGÐISEFTIRLITSSVÆÐA Á ÍSLANDI (SHÍ)	14

1. INNGANGUR

Árið 2007 er tuttugasta starfsár Heilbrigðiseftirlits Kjósarsvæðis. Það er rekið sameiginlega af Kjósarhreppi, Mosfellsbæ og Seltjarnarnesi. Hlutverk heilbrigðiseftirlits er að sjá um að ákvæðum laga nr. 7/1998, um hollustuhætti og mengunarvarnir, sé framfylgt. Einnig ákvæðum reglugerða, heilbrigðissamþykktu og ákvæðum í sérstökum lögum og reglum sem heilbrigðisnefndum er, eða kann að vera falið að annast framkvæmd á.

2. FJÁRMÁL

Ársreikningar Heilbrigðiseftirlitsins verða birtir í sérstakri skýrslu þegar endurskoðun liggur fyrir.

Eftirlitsgjöld voru innheimt af fyrirtækjum skv. gjaldskrá nr. 44/2006 fyrir heilbrigðis- og mengunarvarnaeftirlit á svæði Heilbrigðiseftirlits Kjósarsvæðis.

Alls eru 233 eftirlitsskyld fyrirtæki á svæði heilbrigðisnefndarinnar, og fjölgaði þeim um 7 frá síðasta ári. Um helmingur er á mengunarsviði og um helmingur á heilbrigðis- og matvælasviði. Nokkur fyrirtæki falla undir bæði sviðin. Heilbrigðiseftirlitið hefur einnig eftirlit í fyrirtækjum sem ekki eru starfsleyfis skyld, t.d. vegna laga um tóbaksvarnir.

3. STJÓRNSÝSLA

Heilbrigðisnefnd var skipuð með eftirfarandi hætti í lok árs:

Aðalmaður	Varamaður	Sveitarfélag
Inga Hersteinsdóttir, formaður D	Erna Nielssen, D	Seltjarnarnes
Kristín Ólafsdóttir, N	Magnús Rúnar Dalberg, N	Seltjarnarnes
Helgi Sigurðsson, D	Hanna Bjartmars Arnardóttir, V	Mosfellsbær
Anna Sigríður Guðnadóttir, S	Jóhanna B. Magnúsdóttir, V	Mosfellsbær
Steinunn Hilmarsdóttir, Á	Guðný G. Ívarsdóttir Á	Kjósarhreppur
Þóra Gréta Þórisdóttir	Guðni Þórðarson	Fulltrúi atvinnulífs

Heilbrigðisnefnd hélt 8 fundi á árinu. Fundargerðir heilbrigðisnefndar eru birtir á heimasíðu eftirlitsins.

Á dagskrá nefndarinnar er helst að telja eftirfarandi mál: Þvingunaraðgerðir vegna útistandandi krafna, umgengnismál, umsagnir um bygginga- og skipulagsmál, frumvörp til laga og afgreiðslu starfsleyfa. Nefndin fjallaði einnig um rannsóknir innan eftirlitssvæðisins.

Í 1. töflu er yfirlit yfir starfsleyfi og tóbakssöluleyfi sem heilbrigðisnefnd samþykkti árið 2007. Í einu tilviki var tímabundnu starfsleyfi hafnað.

Heilbrigðisnefnd viðurkenndi eitt námskeið í grunnuppeldi á hundum en sá sem sótt hefur slíkt námskeið getur sótt um lækkun á eftirlitsgjöldum.

1. tafla: Starfsleyfi og tóbakssöluleyfi árið 2007

Tegund starfsleyfisumsóknar:	Fjöldi:
Veitinga- og gististarfsemi	6
Fræðslustarfsemi gæsla og íþróttamannvirki	5
Matvælaframleiðsla og verslun	5
Daggæsla í heimahúsum	3
Önnur starfsleyfi skv. rg. um hollustuhætti	5
Eggjaframleiðsla	1
Bílastarfsemi, járn- og vélsmiðjur	8
Plast / gler / steypuiðnaður	2
Verslun með efnavörur	2
Önnur starfsleyfi á mengunarsviði	3
Tímabundið leyfi	9
Tóbakssöluleyfi	3
Samtals	52

1.3 KVARTANIR

Alls voru skráðar 75 kvartanir árið 2007. Í 2. töflu eru kvartanir flokkaðar eftir málaflokkum.

2. tafla: Kvartanir árið 2005 til 2007

Umkvörtun	2005	2006	2007
Lyktarmengun	2	7	2
Hreinlæti ábótavant	2	3	1
Slysavarnir	3	5	2
Dýrahald	5	5	7
Umgengni	3	5	3
Úrgangur	9	7	17
Loftmengun	1	1	1
Hávaðamengun	4	6	5
Vatnsmengun	1	6	14
Stjórnsýsla og fyrirtæki	0	2	3
Meindýr	0	0	8
Meðferð matvæla	0	2	1
Matarsýking/eitrun	0	1	2
Aðskotaefni og hlutir	0	0	0
Húsnæði og búnaður	2	2	2
Merkingar/efnainnihald	0	0	3
Annað	0	1	4
Samtals	32	53	75

1.4 ÞVINGUNARÚRRÆÐI

Heilbrigðisnefnd lagði ekki á nýjar dagsektir á árinu en dagsektarreikningur eins fyrirtækis var útistandandi í árslok. Í tveimur tilvikum var starfsemi stöðvuð.

2. MATVÆLAEFTIRLIT

2.1 INNRA EFTIRLIT

Samkvæmt matvælaeignarlögum eiga öll matvælafyrirtæki að hafa sett upp viðurkennt innra eftirlitskerfi. Hlutverk heilbrigðiseftirlits er að viðurkenna slík kerfi og leiðbeina við uppsetningu þeirra. Um 43 fyrirtæki voru með innra eftirlit í árslok. Þau fyrirtæki sem eiga að hafa innra eftirlit á svæðinu eru flest komin með það í einhverri mynd. Starfsleyfi voru veitt nýjum fyrirtækjum með skilyrði um að innra eftirliti verði komið á.

2.2 VERKEFNI Í MATVÆLAEFTIRLITI

Heilbrigðiseftirlitið tók þátt í 6 verkefnum á landsvísi með öðrum heilbrigðiseftirlitssvæðum (HES) og Umhverfisstofnun (UST) þar sem gerlaástand matvæla eða annað var kannað. Öllum verkefnum var lokið með skýrslu og eru þær tíundaðar í 3. töflu.

3. tafla: Skýrslur um verkefni á matvælasviði á árinu 2007.

Verkefni
1. Villandi merkingar
2. Matvæli á boðstólum á líkamsræktarstöðvum
3. Kælihitastig og uppröðun í kæla og frysta
4. Könnun á örveruástandi krydds á markaði mars-apríl 2007
5. Hollustuhætti í sjoppum/skyndibitastöðum og örveruástand steiktra borgara
6. Merkingar ávaxtasafa, ávaxtanektars og annarra drykkja 2007

Hægt er að nálgast skýrslurnar á heimasíðu Umhverfisstofnunar á slóðinni www.ust.is.

Heilbrigðiseftirlit Kjósarsvæðis lætur rannsaka sýni sem tekin eru í tengslum við ofangreind verkefni. Auk þess eru tekin sýni við reglubundið eftirlit með neysluvatni, af matvælum þegar hitastig, hreinlæti, hráefni, vinnubrögð eða kvartanir benda til að matvæli séu varhuga-verð. Í 4. töflu er yfirlit yfir sýni.

4. tafla: Fjöldi sýna eftir verkefnum árið 2005.

Verkefni	Fjöldi sýna	Þar af ófullnægjandi
Venjubundið eftirlit	1	0
Hamborgarar	5	0
Grunur um sýkingu	2	0
Ís úr vél	1	1
Krydd	6	0
Neysluvatn opinberar veitur	45	0
Neysluvatn einkaveitur	9	3
Samtals	69	4

2.3 NEYSLUVATN

GÆÐI VATNSINS

Fylgst var reglulega með gæðum neysluvatns á svæðinu og var stuðst við ákvæði reglugerðar nr. 536/2001 um neysluvatn um fjölda sýna. Alls voru tekin 54 sýni til gerlarannsóknna, sjá 5. töflu.

5. tafla: Niðurstöður vatnssýna eftir staðsetningu.

Sýnatökustaður	Fjöldi sýna	Nothæf	Ónothæf
Seltjarnarnes, dreifikerfi	12	12	0
Mosfellsbær, dreifikerfi	11	11	0
Mosfellsbær Laxnesdý	11	11	0
Mosfellsbær Guddulaug	11	11	0
Mosfellsbær einkavatnsból	0	0	0
Kjós einkavatnsból	9	6	3
Samtals:	54	51	3
Hlutfall:	100%	94%	6%

Gæði vatns í sveitarfélögunum eru almennt góð þar sem vatnið kemur úr dreifikerfi eða vatnsbóli sveitarfélags. Sýni í Kjós var tekið hjá rekstraraðilum. Þessi vatnsból eru venjulega reist yfir uppsprettum með ágætu grunnvatni en hætt er við mengun í þeim frá yfirborðsvatni.

VATNSVERND

Framkvæmdastjóri heilbrigðiseftirlitsins sat í framkvæmdastjórn vatnsverndarsvæðis höfuðborgarsvæðisins. Framkvæmdastjórnin hélt 7 fundi á árinu 2007 og tók fyrir 21 dagskrárliði. Til umfjöllunar voru málefni er varða skipulagsmál, rannsóknir, samráð, umferðamál og uppgræðslu og verður gerð grein fyrir helstu atriðum þeirra hér á eftir.

Sú þróun hefur átt sér stað á undanförunum árum að byggðin er að þokast æ meir í átt að vatnsverndarsvæðinu. Þá er vaxandi áhugi á að koma upp aðstöðu til útivistar, fyrir íþróttastarfsemi, að reisa sumarhús og aðstöðu til að þjónusta slíka starfsemi. Óheft uppbygging getur stefnt vatnsvernd í voða og því er brýnt að fyllsta gát sé höfð. Tillögur að nýju skipulagi hafa verið kynntar fyrir framkvæmdastjórninni en að hennar mati er þó löngu tímabært að horft sé til framtíðar og ráðist verði í heildstætt skipulag innan vatnsverndarsvæðisins þar sem vatnsvernd til framtíðar yrði betur tryggð.

3. HOLLUSTUEFTIRLIT

3.1 ALMENNT HOLLUSTUEFTIRLIT

Reglubundnu eftirliti var sinnt í almennu hollustueftirliti.

3.2 HUNDAEFTIRLIT

Hundahald í Mosfellsbæ og á Seltjarnarnesi sætir takmörkunum sem getið er í samþykktum þessara sveitarfélaga. Í Kjósarhreppi hefur ekki verið sett sérstök samþykkt um hundahald.

Misbrestur er á að allir hundeigendur þrifi upp eftir hunda sína eins og kveðið er á um í samþykktum. Æskilegt er að settar verði upp ruslahirslur með reglulegu millibili við göngustiga í Mosfellsbæ þar sem það á við en örfáar ruslahirslur eru nú við göngustiga bæjarins. Hundum fjölgaði um 13% á Seltjarnarnesi. Í Mosfellsbæ hefur hundum fjölgað um 6-10% á ári síðustu ár.

SELTJARNARNES

Ingimundur Helgason sinnti starfi hundaeftirlitsmanns á Seltjarnarnesi. Eftirfarandi eru skráðar upplýsingar um hundamál á Seltjarnarnesi árin 2003-2006. Í töflu 6 eru upplýsingar um hunda á Seltjarnarnesi.

Tafla 6. Upplýsingar um hunda á Seltjarnarnesi

	2003	2004	2005	2006	2007
Leyfi í gildi	120	132	120	125	143
Skráningar	19	19	9	14	25
Afskráningar	8	7	21	9	7
Kvartanir	24	24	25	38	31
Handsamaðir hundar	6	14	10	8	10

MOSFELLSBÆR

Haukur Nielsson sinnti starfi hundaeftirlitsmanns í Mosfellsbæ. Eftirfarandi eru skráðar upplýsingar um hundamál í Mosfellsbæ árin 2003-2007. Í töflu 7 eru upplýsingar um hunda í Mosfellsbæ.

Tafla 7. Upplýsingar um hunda í Mosfellsbæ

	2003	2004	2005	2006	2007
Leyfi í gildi	280	315	352	375	404
Skráningar	57	81	79	74	88
Afskráningar	42	46	42	51	60
Kvartanir	88	72	105	84	35
Handsamaðir hundar	41	26	30	15	32

3.3 MEINDÝRAEYÐING

SELTJARNARNES

Meindýraeyðing Reykjavíkurborgar sá um eyðingu meindýra á Seltjarnarnesi. Í skýrslu Guðmundar Björnssonar verkstjóra kemur fram að eitrið hafi verið kerfisbundið í holræsabrunna og í fjörur, auk þess sem sinnt hafi verið kvörtunum vegna rottu- og músagangs. Notuð voru um 132 kg af eitri sem komið var fyrir í holræsakerfi. Í sex tilvikum var kvartað yfir rottum og í þremur tilvikum vegna músa. Að beiðni Seltjarnarnesbæjar voru einnig skotnir fimm minkar.

MOSFELLSBÆR

Meindýraeyðing í Mosfellsbæ var í höndum Ingólfs Hjartarsonar meindýraeyðis. Í skýrslu hans kemur fram að útköll vegna músa hafi verið 73 og þrjú vegna rottu. Notuð voru um 40 kg af eitri.

Rottur hafa verið sjaldséðar í Mosfellsbæ undanfarna áratugi og hafa engar kvartanir borist um rottur í mörg ár. Árið 2006 urðu menn varir við rottur í nokkrum mæli og var Guðmundur Björnsson fenginn til að gera úttekt á útbreiðslu rotta í Mosfellsbæ og í Mosfellsdal árið 2007 og til að sjá um eyðingu þeirra. Samtals veiddust rottur xxxxx í Mosfellsbæ.

3.4 EFTIRLIT MEÐ ÍBÚÐARHÚSNÆÐI

Nokkuð er um að ósamþykktar og ófullnægjandi íbúðir séu nýttar sem starfsmannabústaðir fyrir erlenda starfsmenn. Heilbrigðiseftirlitið hefur tekið út og jafnvel bannað notkun á slíku húsnæði. Samkvæmt reglugerð um hollustuhætti nr. 941/2002 eru starfsmannabústaðir og starfsmannabúðir starfsleyfisskyldar hjá heilbrigðiseftirliti. Ein forsenda þess að unnt sé að gefa út starfsleyfi er að húsnæðið sé samþykkt af byggingarnefnd til þessara nota. Búseta í ólöglegu húsnæði hefur aukist síðustu ár en það skapar ýmiskonar vanda og hættur fyrir íbúa. Heilbrigðiseftirlit, byggingaefirlit og eldvarnareftirlit hafa haft áhyggjur af þessari þróun og hefur úttektarverkefni í samvinnu þessara aðila verið í undirbúningi. Heilbrigðiseftirlit hefur einnig eftirlit með leiguhúsnæði þegar leigutakar kvarta yfir sínum aðbúnaði en sjaldgæft er að kvartanir berist frá fólki í óviðunandi húsnæði.

3.5 FUGLAFLENSA

Á árinu lá umræða um fuglaflensu að miklu leiti niðri hvað varðar heilbrigðiseftirlit en samráð um þessi mál eru hjá slökkviliði höfuðborgarsvæðisins sem kallar aðila til ef viðbragðsstaða gagnvart fuglaflensu breytist. Á þessu stigi munu viðbrögðin einkum felast í því að miðla réttum upplýsingum til almennings.

4. UMHVERFISEFTIRLIT

4.1 ALMENN UMGENGNI

Málum sem upp komu vegna umgengni við heimahús var sinnt jafn óðum og fylgt eftir samkvæmt samþykktum sveitarfélaganna um umgengni og þrifnað utan húss.

Starfsmenn áhaldahúss sveitarfélaganna hafa umboð heilbrigðiseftirlits til að líma aðvörunarlímmiða á númerslausa bíla og fjarlægja ef þörf krefur. Þegar upp hefur komið ágreiningur hefur heilbrigðiseftirlitið tekið við málinu og framfylgt skv. lögum þar um. Heilbrigðiseftirlitið hefur einnig aðstoðað húsfélög að setja reglur sem taka á málum á lóðum fjöleignarhúsa. Þar hefur eftirlitið ekki lögsögu. Húsfélög geta sett reglur um umgengni á lóðum sínum á grundvelli laga um fjöleignarhús nr. 26/1994.

4.2 ÚRGANGUR

Um meðhöndlun úrgangs gilda lög nr. 55/2003 og á grundvelli þeirra hafa verið settar reglugerðir um meðhöndlun úrgangs nr. 737/2003, reglugerð um urðun úrgangs nr. 738/2003 og reglugerð um brennslu úrgangs nr. 739/2003.

Í reglugerð um meðhöndlun úrgangs eru ákvæði um að sveitarfélög geri svæðisáætlun um meðhöndlun úrgangs. Markmiðið svæðisáætlunar er að dregið sé úr myndun úrgangs og að endurnotkun og endurnýting sé aukin. Í svæðisáætlun á einnig að gera grein fyrir leiðum til að draga úr magni þess lífræna heimilisúrgangs sem berst til urðunarstaða, sem og leiðum til að minnka annan lífrænan úrgang. Fulltrúi Heilbrigðiseftirlits Kjósarsvæðis kom að þessari vinnu á fyrstu stigum en nú hafa Sorpsamlög SORPU, Sorpstöðvar Suðurlands, Sorpeyðingarstöð Suðurnesja og Sorpurðun Vesturlands ákveðið að vinna sameiginlega að gerð svæðisáætlun. Nokkrir hópar ráðgjafa hafa komið að verkinu og unnið að úttekt á mismunandi lausnum (jarðgerð, gasgerð, brennslu og urðun) undir verkefnastjórn VGK Hönnunar. Lokaskýrslur liggja fyrir og hefur verið kynnt og samþykkt af sveitarfélögunum.

SORP

Sorphirða á óflokkuðum heimilisúrgangi á vegum Mosfellsbæjar og Sel-tjarnarness fer fram á tíu daga fresti. Íbúar höfuðborgarsvæðisins eiga kost á að flokka sorp en það er ekki skylda. Þó er skylt að skila spilliefnum. Þeir sem vilja flokka sorp verða að koma því á móttökustað, á endurvinnslustöðvar Sorpu, eða í pappírs/fernugáma. Í Kjós hefur Gámaþjónustan lagt til gáma fyrir óflokkaðan heimilisúrgang en auk þess er ein gámastöð í Kjós þar sem fólk getur flokkað frá timbur, málma og spilliefni. Atvinnulífið hefur sömu möguleika til flokkunar og heimilin en þarf að flokka og skila spilliefnum til Efnamóttökunnar í Gufunesi eða annarrar viðurkenndrar móttökustöðvar fyrir slíkan úrgang.

FRÁVEITA

Á árinu 2007 var sýnatökum vegna rannsóknar á gerlamengun við strandlengju Mosfellsbæjar og Seltjarnarnes haldið áfram og verður unnið úr niðurstöðum skýrsla á næsta ári til samanburðar við skýrslu frá árinu 2006. Verkefnið hefur staðið samfleytt frá árinu 2004 og var áfangaskýrsla gefin út árið 2006. Markmiðið með rannsókninni er að bera mengun við ströndina við viðmiðunarmörk í reglugerð um fráveitur og skólp og jafnframt að safna upplýsingum um breytingar sem kunna að verða á gerlaástandi sjávar við ströndina.

Í Mosfellsbæ var dælustöðin neðan Holtahverfis tekin í notkun svo nú er öllu skolpi úr Mosfellsbæ dælt til Reykjavíkur, þ.m.t. Leirvogstunguhverfið. Mosfellsdalur og einstaka hús utan þéttbýlis er þó eftir sem áður á rotþró.

ROTÞRÆR

Heilbrigðiseftirlitið heldur skrá yfir rotþrær við heilsárshús í Mosfellsbæ sem eru tæmdar annað hvert ár af verktaka. Jafnframt sinnir eftirlitið kvörtunum vegna þessa málaflokks.

Fjöldi aðila án fullnægjandi rotþróa í Mosfellsbæ og Kjós er nokkuð áhyggjuefni. Rotþrær vantar, þær eru of litlar eða síubeð eru ekki tengd við frárennsli rotþrónna. Margar rotþrær eru tæmdar óreglulega, sumar jafnvel aldrei. Samkvæmt leiðbeiningum Umhverfisstofnunar um rotþrær og siturlagnir er æskilegt að tæming fari fram annað hvert ár. Bæjarstjórnir hafa heimild skv. lögum nr. 7/1998 um hollustuhætti og mengunarvarnir til að setja samþykkt um rotþrær til að tryggja rétta byggingu og virkni þeirra. Heilbrigðisnefnd lagði fram tillögu að slíkri samþykkt fyrir bæjarstjórn Mosfellsbæjar síðast árið 2003 en hún hefur ekki verið staðfest. Sveitarfélögum er heimilt að taka gjald vegna tæmingu rotþróa á grundvelli gjaldskráa sem þeim er heimilt að setja samkvæmt ofangreindum lögum.

Kjósarhreppur setti sér samþykkt um meðhöndlun seyru í hreppnum. Þar kemur fram að losun rotþróa skal fara fram 3ja hvert ár. Gerður hefur verið verksamningur við þjónustuaðila um framkvæmd verksins. Fasteignareigendum gefst kostur á að hafa samband við hreppinn og panta losun á einstakri rotþró en að öðru leiti er ákveðin svæði tekin fyrir á hverju ári. Skilja er í þjónustubifreiðinni sem skilur fasta seyru frá þeirri fljótandi sem er dælt aftur í þrærnar.

4.3 VÖKTUN VATNASVÆÐA

FLOKKUN VATNA

Búið er að flokka flestar stærri ár og vötn á svæðinu sem voru á áætlun. Í 8. töflu er yfirlit yfir flokkaðar ár og vötn á svæði eftirlitsins.

8. tafla: Yfirlit yfir ár og vötn sem heilbrigðiseftirlitið hefur flokkað á grundvelli reglugerðar nr. 796/1999 um varnir gegn mengun vatns

Ár	Flokkunarár	Vötn	Flokkunarár
Úlfarsá	2001	Meðalfellsvatn	2003
Varmá	2001/2004*	Leirvogsvatn	2003
Kaldakvísl	2001	Hafravatn	2003
Leirvogsá	2001	Hvalvatn	2003
Bugða	2001		
Laxá í Kjós	2001		
Fossá	2002		
Brynjudalsá	2002		
Kiðafellsá	2002		
Botnsá	2002		
Aðrar ár sem önnur eftirlitssvæði hafa flokkað og liggja að sveitarfélagamörkum			
Hólmsá/Suðurá	2004		

*Endurflokkun framkvæmd 2007 á grundvelli sýna sem tekin voru árið 2004.

Unnt er að nálgast flokkunarskýrslur fyrir einstakar ár og vötn á vef heilbrigðiseftirlitsins á slóðinni http://www.eftirlit.is/flokkun_vatna.htm, þar er einnig að finna nákvæma lýsingu á hverju verkefni fyrir sig.

Heilbrigðisnefnd ákvað að láta framkvæma viðamikla lífríkisrannsókn í Hafravatni á árinu 2007 í samstarfi við Mosfellsbæ og umhverfissvið Reykjavíkur. Náttúrustofa Kópavogs sá um framkvæmd verkefnisins og er skýrsla væntanleg á árinu 2008. Vonast er til að niðurstöðurnar nýtist sem flestum en sem dæmi þá mætti nota þær til að semja námsefni fyrir grunnskóla, líkt og gert hefur verið fyrir Vífilsstaðavatn og Elliðavatn. Einnig getur verið kjörið að koma niðurstöðum á framfæri á fróðleiksskiltum í námunda við vatnið.

TILKYNNINGAR UM ÓHÖPP VEGNA MENGUNAR

Í september valt oliubíll frá Olíudreifingu í Kjósarskarði. Tankar bílsins sem innihéldu um 8000 L af litaðri díselolíu rofnuðu ekki og var allri olíu dælt af honum. Um það bil 100 L af díselolíu í eldsneytisgeymi bílsins og einhver glussi lak niður í jarðveg í vegkanti. Olíumengaður jarðvegur var fjarlægður. Nokkrar aðrar tilkynningar bárust frá Slökkviliði höfuðborgarsvæðisins vegna mengunaróhappa. Í þeim tilvikum var um minniháttar olíumengun að ræða sem var hreinsuð með upp með ísogsefnum.

4.4 UMSAGNIR

Vaxandi þáttur í starfsemi heilbrigðiseftirlitsins eru umsagnir ýmis konar, þar á meðal um hvort framkvæmdir skulu háðar mati á umhverfisáhrifum og hvort matsskýrslur séu fullnægjandi.

Heilbrigðiseftirlitið fjallaði m.a. um matsáætlun um efnistöku af hafsbotni í Hvalfirði. Umsögn um deiliskipulag fyrir Helgafellshverfi, 3. áfanga, Mosfellsbæ. Umsögn vegna lagningu Nesjavallalínu 2, jarðstrengs og

lagningu hitaveituæðar frá Hellisheiðarvirkjun. Umsögn um tengibrautina Skarhólabraut, Vesturlandsvegur –Hafravatnsvegur í Mosfellsbæ.

Heilbrigðiseftirlitið gerði athugasemdir við starfsleyfi AGVA, sem UST gefur út, fyrir allt að 3000 tonna þorskeldi í Hvalfirði.

Á árinu 2007 vann eftirlitið umsagnir um um tvær deiliskipulagstillögur, Vindás nr. 5 og Vindás nr. 7.

Heilbrigðiseftirlitið gerði umsagnir um fráveitu- og hreinsibúnað sem fyrirhugað er að nota við meðhöndlun, hreinsun og losun á ofanvatni frá Leirvogstungu og Tungumelum og frá Helgafellshverfi.

5. STARFSMENN, STARFSHÓPAR OG RÁÐSTEFNUR

Starfsmenn heilbrigðiseftirlitsins eru tveir, Þorsteinn Narfason, umhverfisfræðingur, framkvæmdastjóri eftirlitsins og Árni Davíðsson líf-fræðingur. Sesselja M. Sveinsdóttir, matvælafræðingur var ráðin tímundið í þrjá mánuði í matvælaeftirlit þar sem Þorsteinn tók fæðingarorlof á árinu. Árni sinnti starfi framkvæmdastjóra á meðan.

Starfsmenn tóku þátt í samráðsfundum Umhverfisstofnunar og heilbrigðiseftirlits sveitarfélaga eins og undanfarin ár. Þorsteinn sótti vofund heilbrigðiseftirlitssvæðanna með Umhverfisstofnun og Matvælastofnun sem var haldinn á hótél Flúðum 9. og 10. maí. Haustfundur þessara sömu aðila var haldinn 10. og 11. október í Reykjavík. Einnig sótti Árni aðalfund Samtaka heilbrigðiseftirlitssvæða á Ísafirði sem staðgengill framkvæmdastjóra þann 4. október 2007.

Árni Davíðsson sat í starfshópi Heilbrigðiseftirlits sveitarfélaga og Umhverfisstofnunar um efnavörur. Starfshópurinn gekkst m.a. fyrir námskeiði í merkingu efnavara í Reykjavík í febrúar og verkefni um notkun efnavara í grunnskólum. Árni sat einnig í starfshópi sömu aðila um almennt hollustueftirlit. Starfshópurinn hefur unnið að gerð samræmdra starfsleyfisskilyrða fyrir hollustustarfsemi. Árni sótti fund norrænna eftirlitsaðila með efnavörum í Tuurku í Finnlandi á árinu og fund matvælaeftirlitsins á norðurlöndum í Helsinki.

Á heimasíðu heilbrigðiseftirlitsins má nálgast fundargerðir heilbrigðisnefndar, skýrslur, lagasafn, starfsleyfisskilyrði fyrir starfsleyfisskyld fyrirtæki og hvaðeina sem tengist starfsemi þess. Slóðin er: <http://www.eftirlit.is>.

6. SAMTÖK HEILBRIGÐISEFTIRLITSSVÆÐA Á ÍSLANDI (SHÍ)

Samband heilbrigðiseftirlitssvæða á Íslandi var stofnað árið 1999. Markmið þessa sambands er að standa vörð um heilbrigðiseftirlit á Íslandi og stuðla að árangursríku, óháðu og faglegu eftirliti í samræmi við lög nr. 7/1998 um hollustuhætti og mengunarvarnir.

Tilgangi sínum hyggst samtökin ná með því að:

- Efla samstarf heilbrigðiseftirlitssvæða.
- Stuðla að bættu vinnuumhverfi heilbrigðiseftirlits.
- Samstillu heilbrigðiseftirlitið í landinu í stefnumótun og við umræðu um setningu laga og reglugerða um hollustuhætti og mengunarvarnir.
- Taka virkan þátt í umræðu hverju sinni um hollustuhætti og mengunarvarnir og miðla upplýsingum um alla þætti í starfi heilbrigðiseftirlitssvæðanna.
- Auka tengsl heilbrigðiseftirlitsins við Samband íslenskra sveitarfélaga með það að markmiði að styrkja óháð og faglegt heilbrigðiseftirlit.

Þorsteinn sat í stjórn samtakanna.